



Landjugiprogramm

Oktober - Dezember

2024



Oktoberfest Stuttgart: FR-SO, 04.-06.10.2024

Es isch wieder Läderhose- & Dirndlzyt! Drum geits mitem Hirsbrunner-Car u mit 15 Landjugi-Nase es ganzes Wucheändi ab uf Stuttgart. Du gsehsch: D Ahmäudig isch scho düre u vor Nadine gits de no di letschte Infos.

Steizytparty: SA, 05.10.2024

Wär nid mit uf Stuttgart chunnt, darf sech d Steizytparty vor LJ Heimiswil nid la entgah! Dr Flyer überchunnsch im Chat. U när ab ga Party mache!



Herbstfest MG Utzigen: SA, 12.10.2024

Es isch Herbstfest vor Musikseuschaf Utzige! Da wei mir natürlech o vor Ort si u es feins Raclette ga schnouse. Stattfinge tuet dä Ahlass ir Turnhaue ds Utzige. Mir gseh us uf di 20:00 grad direkt dert u d Jasmin nimmt bis am Abä vorhär dini Ahmäudig entgäge.

Niesä Chilbi: SA, 12.10.2024

Für aui die, wo nid am Herbstfest ds Utzige ahzträffe si: Es isch no Niesä Chilbi vor LJ Niesen u mir wüsse: Die isch super! Dr Flyer drzue chunnt no im Chat.



Wiudässe: DO, 17.10.2024

Es herbschtelet! De gits doch ufem Täuer fasch nüt Passenders aus ä Bitz Wiud? Für das gseh mir us uf di 20:00 bim Klubrum u züggle när ih ds Restaurant Eintracht im Oberthu. Dr Küsu sammlet aui Ahmäudige bis am 06.10.

OLMA: SO, 13.10.2024

Ds legendäre Söilirene u d Bratwurst ohni Sänf muesch eifach gseh ha! Genau us däm Grund si d Plätz im OLMA-Car scho furt u mir fröie us ufene lustige Sunntig. Aui witere Infos überchunnsch vor Melanie.



Schwandfest: SA, 26.10.2024

Bisch o drbi, we mir a däm Samstagabä ds Schwandfest vor LJ Larutia ahstüüre? De mäud di bis am 25.10. bir Andrea ah, chlemm dini Partyluune ungere Arm u zeig di am 21:00 bim Klubrum.

Zoo Zürich: SO, 27.10.2024

Di eigete Chüeh im Stau si ja scho guet u rächt. Aber Elefante, Tigere u Giraffe si eifach nomau ä angeri Liga, oder? Du gsehsch: Dä Sunntig muesch dir dick ihschribe! Mir göh nämlech uf Züri ih Zoo. D Jasmin fröit sech uf dini Ahmäudig bis am 21.10. u träffe tüe mir us 09:30 bim Klubrum.



HIT: SA & SO, 02. & 03.11.2024

Ds HIT isch geng wieder ä HIT! U wüu das Jahr d LJ Frienisberg-Süd dä Ahlass organisiert, ischs für us sogar ä Chatzesprung. Bisch bi däm 2-Tages-Usflug o drbi? Am Samstag düre Tag geits um Spiel & Spass. D Super Mario Party ghört de zum Abäprogramm u am Sunntig göh mir no d Zuckerfabrik uf Aarberg ga ahluege. Das wird dr HIT! Ahmäude darfsch di bis am 11.10. bir Melanie.



Regio-Fondue: FR, 08.11.2024

Chääs, ganz viu Chääs. We dir itz scho dr Söifer im Muu zämelouft, de isch das genau di Ahlass! Organisiert wird ds Regio-Fondue hüür vor LJ Heimiswil. Dr Ändu fröit sech uf dini Ahmäudig bis am 14.10. u Träffpunkt isch am 19:00 bim Klubrum.

Cordonbleu Festival: SA, 09.11.2024

Witer geits mit Chäs! & zwar am Cordonbleu Festival vom UHT Arni. Dert chasch du dir dr Buuch mit Cordonbleu, Pommes u Salat so öppis vo vuschlah! Dass mir de o sicher Plätzli verwütsche, traffe mir üs scho am 17:30 ds Arni vor dr Turnhau. Ahmäudige sammlet dr Bärni bis am 07.11.

Volleyballturnier: SO, 10.11.2024

Ä gmüetleche u glich sportleche Sunntig – das isch ds Volleyballturnier! Ganz viu Teams vo angerne Landjugis si drbi, aber o mir Worbletaler wei nid fähle. Mäud di bis am 01.11. alleini oder aus 6er-Team bir Andrea ah. Mir trainiere a zwöine Äbe ir Turnhalle ds Utzige: 30.10. u 06.11. Ds Turnier säuber startet de am 10.11. am 10:00 im Worbode. Mir si aber froh, we paar freiwiuegi Häng oscho vorhär chönnte cho häufe zwägmache – merci!



Tennis spile: MI, 13.11.2024

Badminton hei mir überläbt, itz wage mir üs ah d Tennis-Schlegere! Chunnsch o mit? Für das gseh mir üs 19:30 ds Kehrsatz u ahmäude darfsch di bis am 08.11. grad direkt bir Andrea.

Dänischs Wiehnachtsässe: SA, 16.11.2024

Hesch du scho mau dr Simu u dr Lucas gseh für d Landjugi choche? Mir o nid! Aber genau das hei di zwöi a däm Samstigabä vor. Weli dänische Spezialitäte mir zwüsche d Zäng überchöme, steit no ih dä Sterne u d Plätz si uf 15 Nase begrängt. Stattfinge tuets ir Chochschueu im Boll. Aui witere Infos chöme no, ahmäude darfsch di bir Linda.



Güetzele: SO, 17.11.2024



Güetzele isch geng guet. Aber güetzele mit dr Landjugi isch no viu besser! Drum traffe mir üs a däm Sunntig uf di 13:00 ir Chochschueu im Boll u tüe zäme güetzele. Aui Güetzi, wo nachem Schnouse no übrig si, dörfe natürlech mitheigno wärde. D Nadine fröit sech uf viu Güetzi-Ahmäudige bis am 13.11.

Schwinge: DI, 19.11.2024

Was dr Walther Ädu cha, chöi mir öppe o, oder? Obs de o würklech so isch, wärde mir zäme usefinge. Aui Infos zu däm Schwingabä chöme no vor Jasmin. Si nimmt de o grad dini Ahmäudig entgäge.

Schigge Abä: FR, 22.11.2024

Mir si ja geng schigg. Aber a däm Fritigabä zeige mir üs wieder einisch vore bsungers schigge Site u göh zäme schigg ga Znacht ässe. Drum schnapp dir es hübsches Chleid oder ä schigge Ahzug, montier es paar flotti Schueh u mäud di bir Andrea ah. Dr schigge Abä fingt ds Bärn statt u mir gseh üs ufem 19:04-Bähnli im Boll.

Hosenträgerchilbi: SA, 23.11.2024

Chiubine gits überau. Aber ä Chiubi ih Hosenträger gits eifach scho nume bir LJ Schallenberg. Drum: Hosenträger sattle, bis am Abä vorhär bim Küsu ahmäude u de gseh mir üs uf di 21:00 bim Klubrum.

Santa Run: FR, 29.11.2024

Hoohoo, itz si wieder aui Santa's gfragt! Üs ziehts nämlech a däm Fritigabä uf Bärn ah Santa Run. Mir nähme im Boll ds 18:34-Bähnli. Ahmäude darfsch di bim Bärni.



Agrama & Openair Fondue: SA, 30.11.2024

We du gärn geisch ga Maschine shoppe oder o eifach gärn dür d Maschine schuehnisch, de muesch mit ad Agrama cho! Ahschliessend ad Agrama ziehts üs no zur LJ Rüeigsbach ah ds Openair Fondue. Besser chönnts auso nid si! Gib am Ändu bis am 26.11. Bscheid, we du im Boll o uf ds 08:34-Bähnli chunnsch.



Wichtele: ab 01.12.2024

Adväntszyt isch o geng Päcklizyt. Drum tüe mir im Dezember enang wichtele. Ahmäude darfsch di bis am 29.11. bir Nadine. Dr Zuefau entscheidet de, wäm du dis Päckli ungerejubilich.

Dessert schnouse: DI, 03.12.2024

Wi üse Tobi so schön seit: Ds Dessert geit nid ih Mage, sondern ih ds Härz. Wo dass mir üser Härzli göh ga fuettere, erfahrsch de no vor Jasmin. Ahmäude darfsch di bis am 29.11. bi ihre u när gseh mir üs uf di 20:00 bim Klubrum.



Chlöisle: FR, 06.12.2024

Chumm doch o mit, we mir a däm Chlouseabä zur LJ Rüeigsbach göh. Mir rücke natürlech mitemne ahständige Chlous u mitemne lustige Schmutzli us. Dini Ahmäudig darfsch grad direkt bim Ändu platziere.

HV: SA, 07.12.2024

Ar jährleche HV gits geng wichtige Sache zum Abstimme u Mitrede. Drum fröie mir üs, di a däm Samstagabä uf di 20:00 im Restaurant Heistrich zgseh. Ahschliessend ah d HV gits de ono es feins Znacht. Du gsehsch: Datum dick ihschribe, d Ihladig fingsch de gli mau ih dim Briefchaste.

Après Ski Party: SA, 14.12.2024

Chunnsch o mit, we mir zur LJ Frienisberg-Süd göh ga Party mache? Di richtigi Antwort isch: JA! Es isch nämlech Après Ski Party! Mir traffe üs uf di 21:00 bim Klubrum u ahmäude darfsch di bis am Abä vorhär bir Andrea.

Stärnemärit: SA, 21.12.2024

Ds Bärn am Stärnemärit heisi fasch aus, wome ir Wiehnachtszyt so brucht: Es Glühwy, es Punsch, öppis zSchnouse u natürlech ä grossi Portion Wiehnachtsstimmig! Chumm o mit, we mir im Boll ih ds 19:34-Bähnli ihstige. Ahmäude bis am Abä vorhär bir Nadine.



Adventsfenster: MO, 23.12.2024

Dr Bärni ladet üs a däm Mäntigabä zu sim Adväntsfenster ih. Es git auso sicher öppis Schöns zum Luege u sicher o öppis feins zum Süüfle. Ahmäude wird für einisch überbewärtet, du darfsch eifach ab dä 18:00 bim Bärni ds Walkringe uftouche.



Spänglercup: SA, 28.12.2024

Ä ganze Tag Spänglercup! Genau das hei mir a däm Samstag vor. Am Morgä geits chli nach dä 07:00 mitem SOMMER-Car ab uf Davos. Ob du dert dr Hockeymatch wosch luege, oder lieber im Festzäut wosch mitfiebere, isch de dir überlah. Am Abä spät chöme mir wieder zrugg. D Linda schickt aber aui witere Infos no u nimmt de o grad dini Ahmäudig entgäge. Dr Ender isch dr Gschwinder, d Plätz si nämlech begränzt.

Klubrum putze: SO, 29.12.2024

Let's clean! U zwar so, dass üse Klubrum när wieder glänzt. Drum si mir froh um viu flissegi Häng, wo bi dere Putzaktion chöme cho mithäufe. Mir traffe üs uf di 11:00 im Klubrum, schnouse zum Zmittag ä Pizza u göh de nachem Putze no ga bowle. Ahmäude darfsch di bis am 26.12. bim Ändu.



Vorschou

- Skiweekend Grächen mit LJ Larutia: 10. - 12.01.2025 → Linda
- Stand an der Fasnacht: 07.-09.03.2025
- Utzigen Chilbi: 11. & 12.04.2025

Kontakt

Andrea: 079 104 36 68
 Jasmin: 079 618 56 20
 Bärni: 076 443 19 57
 Nadine: 077 521 73 69
 Ändu: 077 459 99 18
 Linda: 077 477 23 02
 Küsu: 079 924 67 48

Region West:
 Melanie: 077 525 06 35